

佛說千佛因緣經

【後秦龜茲國三藏鳩摩羅什譯】

佛告跋陀羅波擲：汝今當知，我念過去無量無數阿僧祇劫，彼時有佛，號《淨音如來》，十號具足。彼佛出時，此三千世界七寶莊嚴，如寶莊嚴國等無有異，佛壽二十大劫，正法住世四十劫，像法倍壽八十劫，亦以三乘教化眾生。於像法中，有一比丘，名《一切忍》，持菩薩藏，行菩薩法，遊巡村落，常說此偈：

佛住平等空，法性相亦然，僧依無為會，三寶義無異。
了本性相空，歸依處寂滅，常行真如道，乃應菩薩行。

一切忍大比丘，常說此偈。時華光林中，有千梵志，修四梵行，慈悲喜捨，聞此比丘讚三寶義名，身心歡喜，即白比丘言：於何經中有如此義？

比丘白言：大調御師！於大方等真實經中，說佛、法、僧平等空慧，住一相中。

時千梵志，聞佛、法、僧平等空慧，即思甚深大空智義，八千歲中，端坐正受，於空法中，而不決了，復更思惟，一切法空，於如實際，亦不決了，然不生疑，亦不誹謗，作此思惟。

時有一比丘，名曰智藏，告諸梵志：汝等知不？過去有佛，名《三昧尊豐如來》，十號具足，如是同字百千億佛，皆說甚深般若波羅蜜多。其經中說：不住諸法，法性皆空。如是梵志，於空法中，心不明了，但當一心，歸於空義。

時千梵志，聞此語已，心大歡喜，白比丘言：般若波羅蜜多是大空智，我等今者無明所覆，於空義中無由解了，但於大德所說法中，身心隨喜。

佛告跋陀羅波擲：彼二比丘，善說法者，第一比丘，今已成佛，於妙樂國，《歡喜莊嚴珠王佛》是。若有四眾，聞彼佛名，五體投地，歸依頂禮，即得超越五百萬億阿僧祇劫生死之罪。第二比丘，久已成佛，號《帝寶幢摩尼勝光如來》，十號具足，若有四眾，聞彼佛名，五體投地，歸依頂禮，即得超越七百萬億阿僧祇劫生死之罪。

時千梵志，以聞甚深般若波羅蜜多，身心歡喜，不生驚疑、怖畏、誹謗，即得超越五十億劫生死之罪。捨身他世，即得值遇十六億佛，於諸佛所，得念佛三昧，以莊嚴心，念佛三昧莊嚴心故，漸漸於空法中，心得開解。

跋陀羅波擲！時千梵志，豈異人乎？我等賢劫千佛是，以得聞空法心無疑故，於娑婆世界，次第得成阿耨多羅三藐三菩提；是故一切眾生，應於空義，心無疑惑。佛說此語時，於會大眾，聞佛所說，有得初果，有發無上正真道意，其數甚多，不可具說；一切大眾，聞佛所說，皆大歡喜，頂禮佛足。

出:大正新脩大藏經第 14 冊 No. 0426 佛說千佛因緣經

佛說千佛因緣經
【後秦龜茲國三藏鳩摩羅什譯】

【2】喃謨世尊帝青如意摩尼寶幢勝光明照耀如來【誦七遍】

Namo bhagavate indra-nīla-cintāmaṇi-ratna-dhvaja-prabhāsura-
avabhāsāya tathāgatāya arhate samyak-saṃbuddhāya.

【2019/10/23 日 5.13 P.M. 修正版】

經文: 若有四衆, 聞彼佛名, 五體投地, 歸依頂禮, 即得超越七百萬億阿僧祇劫
生死之罪。【此佛號藏經里原来的名號为《帝寶幢摩尼勝光如來》】

不空摩尼供養帝青如意摩尼寶幢勝光明照耀如來真言【誦七遍】

Om, amogha maṇi pūjā mantra pra-sava vi-kurvite, samanta indra-
nīla-cintāmaṇi-ratna-dhvaja-prabhāsura-avabhāsa tathāgata viṣayam
ā-bharaṇa gandha-sugandha maṇi-ratna gandha-puṣpa pra-varṣaṇa
svāhā.

【公元 2020/3/18 日 12.16 A.M.更新版】

功德迴向帝青如意摩尼寶幢勝光明照耀如來真言【誦三遍】【2020/12/21】

Om, sarva guṇa buddha nāma-dheya-grahaṇe pari-ṇāmane indra-nīla-
cintāmaṇi-ratna-dhvaja-prabhāsura-avabhāsa tathāgatāya svāhā.

注: 这佛號的準確率已經過測試, 加持力很强。

公元 2019/10/24 日 11.18 P.M. 馬來西亞萬撓佛教會蔡文端敬啟。